

Parare Domino Plebem Perfectam

A lokisetse Morena Sechaba se phethehileng (Luka 1,17)

# Moeletsi oa Basotho

www.moeletsiobasotho.co.ls

Ba hlaola  
ba  
furallane



3

Kotsi ea  
mashala

6



Ba aha  
tsela  
moeeng

7



## SEFENEKELETSOA LIKOBO

7

**20 YEARS**  
**1824-2024**  
**BASOTHO**

KETEKELO EA LILEMO TSE MAKHOLO A  
MABELI SECHABA SA BASOTHO SE THEHILOE

# MOELETSI

## Hantle ho etsahalang?

Lesotho lena labo ntat'a rona ho bonahala le entsoe thellelisane kapa sona sebataolo moo bana ba bapalang bolo ea sekatana teng. Lintho tse etsoang ke batho bana ba matleng ke mahlabisa-lihlong a akhang le ho hloka tsoello le hlomphe sechabeng. Motho qalong ha fuoa mosebetsi o tla ikana ka hore o tla sebeletsa 'nete le toka, 'moho le sechaba ka lerato. Empa khabareng o fetola 'mala joaloka lempetje ebe o sa shebana le mpa ea hae a le mong.

Baahi ba Mafeteng ba lla ka morafi ea shebahalang a inkela lirafshoa tsa bona mahala a sa etsetse sechaba lintlafatso tsa letho, leha e se le hona ho hlokomela ba-fallisua. Lekala la Lihloliloeng lona le sitoa ho fana ka litokomane kapel'a Komiti ea Paramente e lisitseng Litaba tsa Lihloliloeng, hoo komiti e nkileng qeto ea hore morafu oo o koaloe ha nakoana hobane lekala le nka litaba tsa sechaba hanyane. Ka lehlakoreng le leng ea arabellang lekala o re morafi ea teng moo o fuoe lengolo la molao hore a sebetse, empa sechaba se qala ho utloa litaba tsena.

Morafa ona ho hlalosa o ile oa qaloa ka selemo sa 1993 ke Basotho ba neng ba itšebelisa lipeke le likharafu ho rafa. Leha ho le joalo ka lebaka la tsoelopele ba ile ba qetella ba e-na le mechini ba se ba qhomisa. Ka selemo sa 2018 morafa o ile oa koaloe hobane nako ea boithuto e felile, sechaba se makala ha o butsoe ho sa ba le lipuisano ho hang. Lekala ha le bontša morafi a fuoe lengolo la molao tjee ana ho ile ha e-ba le puisano le sechaba kapa se sobokelloa likobo molaleng feela?

Ho sa le joalo, bahlanka ba sebetsang Lekhotleng le Lehlo la Teropo ea Maseru(MCC), ba se ba itjele-tse limillione tsa sechaba. Ka kopanelo le kamphani ea balichaba ba bile ntsoeleng ho roka ba ikarabellang mahloan'a naketsana ka hore ba ahile tselang e palamaneng ea Mpilo Boulevard empa ho se joalo. Basotho ba thusa melata ho ja chelete ea habo bona e reretsoeng ho tliša lintlafatso tse tlo thusa bona. Ba itšehisa ka batho le ho tella likelello tsa bona kapel'a balichaba. Batho bao ba entse lintlafatso linaheng tsa habo bona ntle le tšitiso, joale ba thusoa ho tella naha ena ea Morena Mo-shoeshoe ke Basotho.

Sechaba sa Roma se nkile khato kamor'a lilemo tse ngata baithuti ba senya thepa ea sona nakong ea boitseko. Se ithomeletse ka seqo Bookameling ba Sekolo se Seholo sa Sechaba (NUL) ho fana ka lengolo la litletlebo, leo bookameli bo hlalositse bo tla le sheba. Mookameli oa Lekhotla la Baithuti NUL le eena o tšepisitse hore ba tla shebana le litaba tsena hobane ho na le karolo e 'ngoe ea batho e nkang monyetla nakong ea boitseko ebe e etsa liketso tse sa lokang. Kannete bohle ke thapeli hore ba etse lipatlisiso kapele 'me ho nkoe bohato hobane baitšokuli ba senyetsoa thepa eo ba e rekileng kathata.

Ofisi ea Monamoli e ile ea fana ka khotlaletso kamor'a liphuputso tsa eona mabapi le tlhokofatso ea batšoaruoa Litsing tsa Tlhabollo ea Batšoaruoa e etsahetseng ka la 22 Tšitoe ngoahola. Monamoli o khotlaletse hore bahlanka bohle ba nang le seabo litabeng tsena ba nkeloe likhato. 'Musu o nkile khato ka ho behella kathoko chelete e kaalo ka M2Millione e tla sebelisoa ho theha komisi e tla etsa lipatlisiso ka botebo mabapi le litlhokofatso tsena, moo e mong oa batšoaruoa a ileng a lahlehela ke bophelo. Letona la Molao le arabetse tlhoko ea sechaba haholo e hatikelang Litokelo tsa Mantlha tsa botho. E se e le nako e telele joale litokelo tsa batšoaruoa li sa hlone-pshoe hobane ba nkoa e le likebekoa tse sa hlomphe molao. Mohoma temeng ho ba fuoeng boikarabello, Basotho ba lebetse litholoana tse hlabosang.

# M2Millione e theha komisi

## Nthabeleng Seitlheko

Letona la Molao, Mohlomphehi Richard Ramo-eletsi o hlalositse kapel'a sechaba komisi e tlo etsa liphuputso mabapi le litlhokofatso tse neng li etsetsoe batšoaruoa moo e mong a neng a hloka hlahle, ka la 21 ho isa la 22 Tšitoe ngoahola. Tsena lihlahel-tse 'mokeng oa bo-ralitaba oa la 24 'Mesa monongoaha.

O re hlalosa hore Mookameli oa Komisi ke Justice 'Mathaba Realeboha ea tla sebetsa 'moho le Mookameli oa Mehlang oa Litsi tsa Tlhabollo ea Batšoaruoa Mojela Thulo le Adv. Kelebone Maope.

O re mosebetsi ona ba o etsa e le ho phethahatsa likhotlaletso tsa Ofisi ea Monamoli tse hlahel-seng tlalehong ea hae mabapi le liketsahalo tse bileng kahare Litsi tsa Tlhabollo ea Batšoaruoa. O bontšitse

hore likomisi li'a theoa ebe ha ho phethahatsoe likhotlaletso tsa tsona empa lekhetlong lena o tla sebet-sa ka thata ho bona hore li kenngoa tšebetsong, 'me bohle ba lokelang ho hlahle kapel'a Makhotla ba etse joalo.

Litaba tsena li latela hore Monamoli Adv. Tlotliso Polaki a phatlalatsa tlale-ho ea liphuputso tseo a li fumaneng ka la 19 Tl-hakubele monongoaha, ea liketsahalo tsa Tšitoe ngoahola Litsing tsa Tlhabollo ea Batšoaruoa.

O re lipatlisiso li sibolotse hore ka la 22 Tšitoe ngoahola ba tšoaruoa ba robong ba ile ba shapuo hobane ba ne ba shatela bahlanka, 'me ho batšoaruoa ba 650 ba fumane hore ba 300 ba shapuo hamphe ka letsatsi leo. O itse ho latela linako tseo batšoaruoa ba neng ba le libakeng tse fapakaneng ka tsona ho thata hore ba entse ketso eo.

Polaki o ne a bontšitse hape hore tsela eo batšoaruoa ba phopholetsoang ka eona ha se e mo-

laong ho latela setšoantšo seo ba ileng ba se shebel-la se bontšang ketsahalo ena. O re ho ea ka molato batšoaruoa ha ba phopholetsoa ba ema ka leboha ho sheba hore na ha ba letho le seng molaong joaloka mehala ea thekeng kapa matekoane. O re ba utloile hore ka la 22 Tšitoe ngoahola bahlanka ba ile ba kena litsing ho shapa batšoaruoa hohle ho sa tsoelle hore na ba phoso kapa chee.

H'a tsoelapele o itse bahlanka ba neng ba le koetli-song ba ne ba le teng litsing ho latela taelo ea mookameli, empa bao ba pata taba ena 'me hoo ke tlolo ea molao.

Monamoli o ile a etsa khotlaletso ea hore bahlanka bohle ba neng ba ikarabella setsing ka nako eo ba lokela ho nka boikarabello, kaha mosebetsi oa bona e le ho sireletsa batšoaruoa, 'me ba neng ba buleloa batšoaruoa letsatsing leo ba nkeloe likhato tsa molao. Ke bonyane bahlanka ba 40 ba tlamehang ho nkeloa likhato tsa molao.



Contacts: +266 28350 466 / 6260 0983 (Whats app)  
Email: moeletsioabasotho@gmail.com



### Editorial

Lesoetsa Rakubutu (Editor)  
(+266) 58490670 / 62031949  
editor@moeletsioabasotho.co.ls

Lehlohonolo Mohale (Sub-editor)  
(+266) 58 771 507 / 62 771 507  
subeditor@moeletsioabasotho.co.ls

### Advertising

Thabo Lesaona  
(+266) 28 350 466/ sales@moeletsioabasotho.co.ls

### Newsroom

Nthabeleng Seitlheko 57 665 038/ 68 216 721  
nthabeleng.seitlheko@moeletsioabasotho.co.ls

Tšelis Thakholi (Sports) 58 540 853/ 63 480 404  
tseliso.thakholi@moeletsioabasotho.co.ls

newsroom@moeletsioabasotho.co.ls

### Production Desk

'Mateele Liqa, Sr. Canicia Nthunya

# Ba hlaola ba furallane



## Nthabeleng Seithleko

**M**ookameli oa Setsi sa Toantšo ea Bobolu le Bomenemene (DCEO), Knox Molelle, o re sechaba ha se sa na tšepo mafapheng a kabo ea toka le Litsing tsa Tšireletso hobane ba hlaola

ba furallane. Tsena li hlaheletse puong ea hae, thupelong ea Litsi tsa Tšireletso le mafapheng a kabo ea toka, ka la 24 'Mesa monongoaha.

O re 'moka ona o ba thusa ho thakelana ka malebela ho hlola liqholotso tseo ba tobaneng le tsona tšebetso ea bona ea nako ehle. A re hangata ba sitoa ho

kopana ba tentšana tšeea le ho arolela lisebelisoa nako le nako hobane ntoea ea bobolu e hloka kopanelo.

Mochochisi e Moholo, Adv. Hlalefang Motinyane, o bontšitse hore liqholotso tseo ba tobaneng le tsona ke khaello ea basebetsi, kaha ha ba ile ba ea phomolong hore ba eketsoe ke bothata, ntlha e 'ngoe ke

bopaki bo sa fellang bo tlišoang makhotleng.

O re tšebetso ea bona e lokela ho matlafatsoa le ka lisebelisoa hore ba nolofaloe ke ho etsa mosebetsi molemong oa kabo ea toka e potlakileng.

Moemeli oa EU, Anna Renier o re qholotso e kholo e tobaneng le mafapha a kabo ea toka le Litsi tsa Tšireletso ke khaello ea lisebelisoa, ka hona ha mafapha ohle a molao a ka sebetsa 'moho

hoo ho ka nolofatsa mosebetsi.

Mongolisi oa Lekhotla le Phahameng Adv. 'Mathato Sekoai, o re morero o mohlolo oa bona ke ho etsa meralo e tla thusa mafapha a abang toka kahar'a naha, ho akofisa mosebetsi. A re ba lakatsa ho arolelana mosebetsi le ho sebetsa 'moho molemong oa ponatletso.

A re ba lokela ho tsamaea leeto le tšoanang, ba bue puo e le 'ngoe e le ho akofisa mosebetsi oa bona le ho khutlisa tšepo ea sechaba.



# Sechaba sa Roma se ja masoko

## Nthabeleng Seithleko

**S**echaba sa Roma, bahoebi ba likoloi tsa baeti, bo-ramabenkele le baitšokuli ba nehelane ka lengolo la litlelebo Botsamaising ba Sekolo se Seholo sa Sechaba (NUL) leo ba reng ho lekane baithuti ba emise ho senya thepa ea sechaba nakong ea boitseko. Tsena li bile mapatlolong a NUL, ka la 23 'Mesa monongoaha.

Ba re baithuti ba khaotse ho ba senyetsa, ba felle


kahar'a setša sa sekolo ha ba itseka. Ba bontšha ba le seboko ka hore bao ba chotla mabenkele, ba nkela baitšokuli lithepa tsa bona, ba besa mollo kahar'a tsela ea likoloi 'me taba eo e ama phallo ea sephethe-phethe le tsamaiso ea bakuli.

'Mantsejoa Thakaso lebitsong la bahoebi, o supile hore ba utloile bohloko hobane baithuti ba ba senyetsa, 'me sena se etsa hore ba sitoe ho phela, ebile se ama lintlafatso le batseteli ba tla tsamaea hobane ba phela ka tsitsipano. Ka hona ba ipiletsa ho baithuti ho

khaotsa liketso tsena, 'me sekolo se tsebe hore se tla nka boikarabelo ka tšenyoehle e tla etsoa ke baithuti.

Maqalika Lerotholi lebitsong la Bookameli ba NUL, h'a amohela lengolo o hlositse hore ba sa il'othutha lengolo leo, le hore ba tla tsoelapele ka lona joang.

Mookameli oa Lekhotla la Baithuti NUL, Tumo Tsatsanyane, o bontšitse hore ba utloa litlelebo tsa sechaba, 'me ba tliil'obatla ka botebo liketso tseo ho thoeng li etsoa ke baithuti nakong ea boitseko, hobane ho na le karolo ea batho e



nkang monyetla nakong ea boitseko ba baithuti. A re ba tli'osebetsa ka thata ho bona hore sechaba sa Roma se phela ka boiketlo le bolokolohi. A re moo e bang ho bile le liphoso ba tla kopa tšoarelo hobane ha ba rate ho phelisa sechaba ka ho hloka khotso.

E mong oa baqhoabi ba likoloi tsa baeti a tlohang Maseru ho ea Roma, Neo Ramasieane, o supile hore ka nako tshole ha baithuti

ba itseka ba ba sitisa ho sebetsa, kaha ba senya likoloi tsa bona le ho koala litsela. A re litaba tsena li etsa hore ba qetelle ba etsa litlelo tsa molao ho sa hlokahale, kaha baithuti ba ba kenya menoana ka leihlong.

O re khetlong lena ba sobantse lifahleho ka hoo baithuti ba ithokomele ha ba itseka ba felle kahar'a setša sa sekolo ba tlohe likhoebong tsa bona etsoe ba sa hloke letho la bona.

# Bacha tlhahisong ea atchar

**Tšeliso Thakholi**

**M**ebuso ea lefatše matsatsing a morao tjena, e tsoile letšolo ho khothaletsa bacha ho iphelisa ka litsebo tse fapakaneng tseo ba nang le tsona. E ka ba tsa temo, mahlale le tseo ba sa li elang sekolong. Bacha ka ho fapakana, ba na le bolokolohi ba ho khetha hore na motho ka mong kapa ka boikopanyo ba ka etsa eng, ho iphelisa. Ka hona, bacha ba Ha Leqele ba ikopantse ho theha khoebo e ncha e hlahisang atchar ka mefuta ea eona e bitsoang Stella PTY Ltd, eo sepheo sa eona e leng iphelisa ka ho hlahisa mefuta eohle ea atchar ka lijalo tse kang garlic, ginger le tse ling. Khoebo ena e thehiloe ka khoeli Phupjane selemong sa 2019, 'me lihlahisoa tsa bona tsa atchar li ikhetholla ho tse ling ka lebitso la Cosmos Atchar.

Ausi Kebone Mothebe eo e leng eena Mookameli e Moholo oa Stella PTY Ltd, o re hlalose tsa ka moo ba qalileng khoebo ea bona ka teng:

Ha re ntse re le sekolong sa Lithuto tsa Khoebo, mathoasong a selemo sa 2019, re etsa lithuto tsona tsa khoebo 'na le motsoalle oa ka eo re seng re thehile khoebo le eena, re ne re rekisa 'steelwool' se hlatsoang lipitsa. Ka letsatsi le leng eare ha ke hlokomela hore ke motho ea nang le lerato la khoebo joaloka 'na, ka mo atamela ra buisana hore na e ke ke ea e-ba bohla hore ha re ntse re le koano sekolong kaha re ne re kena sekolo 'moho, re ke re qale ho ithehela khoebo ea mofuta oa eona e ra-toang ke rona.

Ka lehlohonolo ka fumana motho eo a neng a se a ntse a e-na le mehopolole e tšoanang le ea ka. Ra lumellana, ra qala ka ho matlafatsa khoebo e nyenyane eo re neng re se re ntse re e-na le eona. Ha nako e ntse e ea, ka sona selemo seo sa 2019 ra qala ho theha khoebo e hlahisang atchar e bitsoang Stella PTY Ltd.



Re ne re sebetsa ka thata haholo nakong eo re ntse re le sekolong kaha re ile ra e batlela 'maraka mabenkeleng ana a maholo 'me ra atleha. Ka selemo sa 2020 ra kopana le bothata boo bohle re bo tsebang ba COVID-19 bo ileng ba thefula lefatše. Khoebo ea rona ea putlama. Hona joale ho tšoana le ha re qalile qalong. Re lahlehetsoe ke 'maraka oa pele, 'me ke hona re qalileng ho tso-solosa. Erekaha re sa qala re hlahisa ho latela hore na baji ba hloka atchar e kae, ea boemo bofe kaha re rekisa ka libotlolo tse nyane, tse bohareng le tse kholo.

Hona joale re rekisetsa batho ba nkang palo e ngata ba il'o rekisa le ka bo-mong. Hajoale kaha re sa ntse re leka ho bona hore khoebo e'a hola re rekisa atchar ea mofuta oa mango le e chilisi. Re qalile ho lokisetsa ho tla bua le beng ba likhoebo tse kholo, ho kenya lihlahisoa tsa rona ka teng. E ka be e se e le khale re qalile ho eketsa lihlahisoa tsa rona, empa qholotso e kholo eo re kopanang le eona, ke ea moo re rekang lintho tseo re etsang atchar ka tsona, e

leng kante ho naha, litheko li phahame, 'me ka nako e 'ngoe li nka nako e telele li sa fumanehe.

Re ikemiselitse hore hang ha re qeta ho fumana 'maraka likhoebong tse kholo, re tli'o eketsa palo

ea bacha bao re sebesetsang le bona. Ntho eo ke e kopang ho bacha ke boikopanyo, e le ho arolelana litsebo le ho thakelana ka malebela litabeng tsa khoebo. Re ka thaba haholo ho thusa bacha le ho sebetsa

le bona, feela ebe bacha ba nang le lerato la khoebo. Ha ba kopana le liqholotso ba se nyahame, ba tsebe hore liqholotso ke mohloli oa katleho, kaha ke tsona tse tla ba holisa le ho ba fa maqiti a ho li hlola.



## BASOTHO FOOD TASTING FESTIVAL

**DATE: 2 - 4 August 2024**  
**Venue: Boqate Leisure Park**

**MORE DETAILS LOADING...**





**SPONSORS:**





# Ho bala ke letlotlo



## Nthabeleng Seithheko

**L**eha molao o sireletsang boqapi le bongoli ba libuka o le teng batho ba ntse ba itsoellapele ho sebelisa 'mino le bongoli ba

libuka ka thoko ho molao. Tsena li hlalositsoe ke sengoli sa libuka tsa Sesotho, 'Mapoulo Mofoka, mabapi le ketekelo ea Letsatsi la Lingolooa, le bang selemo le selemo, ka la 24 'Mesa monongoaha.

O re batho ba hloka tsebo le kutloisiso ea hore na lingolooa ke'ng, li bohlokoa

haka le hore li ka bolokoa joang. A re ha joale libuka li se li fumaneha habonolo ka tšebeliso ea marang-rang ka hona batho ba ka ipalla le ho ipolokela nalane.

Liapeng Raliengoane e mong oa baphatlalatsi ea hloahloa oa babali ba libuka, o re o fumana ho bala e le letlotlo le tšabehang,

kaha motho o ithuta tse ngata tseo a neng a ntse a sa li tsebe. O re ho bala ho thusa ho hlabolla le ho thapolla kellelo, hape ho matlafatsa tsela eo motho a nahanang ka eona.

Potsong ea hore na Basotho ba na le thahasello ea ho bala?

O supile hore ho fihlile tlhokomelong ea hae hore ba bangata ha ba na thahasello ea ho bala libuka ka mabaka a bona, a kenyeletsang ho hloka nako le mamelelo ea ho bala maqephe a mangata le hore ba bang ba ee ba re ha se batho ba ratang ho bala. A re o hopola mantsoe a sengoli se seng a reng, "Ha u batla ho tima motho e motšho litaba, u li ngole faatše."

Raliengoane o re motho a ka qala ho bala hanyane, a ipha metsotso e 10 feela ka letsatsi, leha a ka bala seratsoana se le seng feela o tla be a sebelitse 'me ho e-na le seo a ithutileng sona. "Morutehi e mong o re 'Ho bohlokoa haholo ke tsela eo motho a e nkileng eseng lebelo la hae.' Ka

hoo ke khothaletsa batho ho bala libuka tse ba natefelang eseng tseo lefatše le nahanang hore ba tlameha ho li bala." A rialo.

A re lingoli tsa Basotho ka 'nete li na le talenta empa ka lebaka la thahasello e tlaase ea Basotho ea ho bala, talenta ena ea bona ha e ba phelise ho latela na linaheng tse ling lingoli li phelisoa ke lingoliloeng tsa tsona joang.

A re bothata bo boholo hape ke hore ha motho a batla libuka tsena tsa lingoli tsa hae mona, boholo ba tsona li fumaneha ho beng ba tsona ba lulang hole, ebe qetellong motho o lahleheloa ke thahasello. A eletsa hore lingoli li etse hore libuka tsa tsona li fumanehe ha bobebe litsing tse rekisang libuka litoropong.

A qetella ka hore bothata bo bong bo tobileng lingoli ke hore libuka tsa bona ha li kene ka bongata lethathamong la libuka tse baloang likolong, ka hona a ipiletsa hore li kenngoe ka bongata empa e se ka nako e le 'ngoe.

# Morena Mopeli o orohile

## Nthabeleng Seithheko

**M**orena oa Phuthiatsana Tikolohong ea Ha Paki, Morena Tšiu Mopeli o phomolitsoe borokong ba hae ba ho qetela, setšeng sa bafu sa Ha Paki, Mazenod, ka la 20 'Mesa 2024.

H'a fana ka khotatso Fr. Lawrence Matsora OMI o itse Morena Molimo h'a beha motho lefatšeng o bile o mo sehela le nako ea hae ea ho falla. Ka hona nako ha e felile, e felile ha ho na ea ka e eketsang. A re Morena Mopeli o phetse nako eo Morena Molimo a neng a



mo file eona. "Hona joale o leetong la ho phetha thomo ea ho ea hae leholimong. Molimo o bitsitse mor'a hae h'a fosa. E tsoe ke mohloli oa ho nepa." A rialo.

Mor'a mofu, Monghali Nkoebe Mopeli ea buileng lebitsong la booki o boletse hore Morena Tšiu o qalile ho kula ka selemo sa 2019, 'me a ntse a isoa lingakeng a khutla empa bokulo ba hae bo ntse bo tota. A re morao tjena o ne a se a khatatsoa ke lehlatsi empa ba leka ho mo fa motsoako, ha se ke ha bonahala ho e-na le phetoho ea letho. A re o ile a potlakisetsoa Sepetlele Makoanyane moo a neng a ntse a alafshoa teng, empa ka la 5 'Mesa monongoaha ke ha Morena a mo biletsa hae leholimong. A re sosa sa lefu la hae ebile

bohloko ba ka mpeng (Uiclers) kaha ho ne ho shebala a longoa ka mpeng.

Lebitsong la Rabasotho, Morena oa Sehlooho oa Matsieng Morena Seeiso Bereng Seeiso o qalile pele ka ho tšelisa mohats'a mofu, Mofumahali 'Mankoebe ka hore kamehla h'a kopana le liqholotso tsa bophelo a shebe sefapanong kaha topollo e teng. A re leha batho ba ka bua lipuo tsa maholimo le tsa lefatše, a lumele hore le boemong bona Morena e ntse e le Morena.



"Nkhono oa ka o tšepe Molimo hobane bahlolohali ha ba eo leholimong." O boletse joalo.

A re mofu e ne e le motho ea neng a e-na le tlhomphe e kholo ho Morena oa Sehlooho. "Ba bangata marena matsatsing ana ba

hlompha chelete e hlahang 'musong ha ba hlomphe borena bo ka holimo ho bona." O boletse joalo a bile a hlokomelisa marena hore ke balisa lebitsong la Morena e Moholo.

Mohlomphehi Nthati Moorosi lebitsong la 'muso, o boletse hore sechaba sa Phuthiatsana se bile le lehlohonolo la ho ba le morena ea neng a rata sechaba sa hae le ho se busa ka khotso. Ka hona leha a ne a se a holile, lefu la hae ke tahlehelo e kholo. A etsa tlhahiso hona lepatong moo, ea hore sechaba sa Phuthiatsana le mathoko a eona, se ke se ikopanye se mo etsetse seemahale seo ba tla lula ba mo hopola ka sona. A re seemahale sena e ke ebe khaho ea lebala la Swallows, kaha a ne a rata lipapali haholo, 'me le be le rehoe lebitso la Tšiu Mopeli Stadium.

Mokhethoa oa Lebatooa la Koro-Koro, Abinyane Tšilo o boletse hore ralipolotiki e mong le e mong ea neng a batla ho bua le sechaba se boliseng ba Morena Tšiu, o ne a mo amohela ka mofuthu ho se khethollo ea letho. A re leha ba utloile bohloko ka lefu la hae, moea hae o phomole ka khotso, 'me ba tla lula ba mo hopola kamehla ka tsohle tse ntle tseo a ba sietseng tsona.

Tšilo o bile a bontša ngon-



goreho ea hae e kholo, ka lipolao le bosholu bo bonahalang bo sa ee moriting lebatooeng la Koro-Koro. A ipiletsa ho sepolesa ho siriletsa sechaba sa Basotho, "hantle kapa hampe re tla araba litaba li se li le teng, ha feela motho e le lesholu."

Mofu o ne a hlahe ka la 1 Tlhakubele 1936. A behoa boreneng ba Phuthiatsana, Ha Paki, ka selemo sa 1961 ho fihlela lefu le mo khaletska ka la 5 'Mesa monongoaha. Moea oa hae le oa balumeli bohle ba faletseng o ke o phomole ka khotso.



**Nthabeleng Seithleko**

**H**o bohlokoa hore batho ba qobe ka hohle ho besa mollo oa mashala Mariha, kaha a bu-petsa a bile a sa nepahala polokehong ea bophelo bo botle. Litaba tsena li boletsoe ke setsebi litabeng tsa polokeho le bophelo bo botle Prof. Tšepo Monaheng, puisanong le Koranta, ka la 23

**'Mesa monongoaha.**

O re ke nako ea hore Basotho ba hlokomele bana le ho ipaballa khahlanong le mollo, nakong ena ea Mariha. O re ho na le mefuta ea mello e sa khothaletsoeng hobane e na le litlamorao bophelong ba batho, joaloka mollo oa mashala le oa patsi ea phaena ho latela boima ba monko le mosi oa tsona o ka ahelang ka sefubeng hoo qetelong motho a ka bang le Lefuba. A re ntho e bohloko ke hore mosi oa mefuta ena ea mollo ea taha hoo motho a ka lahleheloang ke bophe-

# Kotsi ea mashala

lo. A re Basotho ba loke-la ho tlosa litloaelo tsa ho robala ba besitse le ho besa mefuta ena ea mollo ka matlong a se nang le lifesetere, hobane ha ho na moo mosi o tsoang le teng. A re kamehla ba khothaletsa hore batho ba sebelise lifuthumatsi tsa parafin, metsi le motlakase kaha tsona li laoleha ha bobebe. A re ho qoba tahlehelo ho motho ea seng a amehile ke mollo haholo ea tukang liaparo, kapa 'meleng motho ea joalo

a se ke a matha. Monaheng o re ntho e teng ke hore ha motho a chele a le maqahanyatsa kapa sebululana ho sa hlaha leqeba khothaletso ke hore ho sebelisoe baselapa e metsi, empa ea tsoileng leqeba ho ka sebelisoa lesela kapa sekipa se hloekileng le teng le se ke la thetsa leqeba a ikoahela feela ho sireletsa boemo boo, 'me a potlakele setsing ho fuma thuso. O tsoetsepele hore motho ea fanang ka thuso a e-na le litsebo

kapa a se na tsona, o lokela ho sebelisa liatlana. O re ha hoa nepahala ho tlamisa leqeba haholo ha motho a se na litsebo hobane ho na le litlhare tse khethihileng tse sebelisoang sebakeng sa kalafo. O ipilelitse ho batsoali ho hlokomela bana khahlanong le mollo le ho lula ba e-na le liatlana, kaha li le bohlokoa. A re ba fumaneha ka linako tsohle ho bona hore ba fana ka koetliso tsa mahala likolong, metseng le libakeng tsa tšebetso.

# Setsi se hloka mali

**Nthabeleng Seithleko**

**E**a tšoereng Molepo e le Mookameli oa Setsi sa Phano

**le Pokello ea Mali Khotso Kalake, o re setsi sa habo se tlokotsing e kholo ea mali a lihlopha tsohle. Tsena li hlahetse puisanong le Koranta ka la 24 'Mesa monongoaha.**

O re setsi se na le mali ao bafani ba ona b'a fileng batho ba itseng e seng e le baithaopi, ka hoo ba tlokotsing e kholo, kaha batho ba bang ba hloka ho fuoa mali ka potlako ho latela bokulo le likotsi tsa likoloi.

A re mali ke tlhoko ea mang le mang ka hona bohle ba lokela ho nka boikarabello ba ho ba baithaopi ba bafani ba mali molemong oa ho pholosa bophelo. O re joko ea ho fana ka mali ha se ea lihlopha tsa ba-

tho tse ikopantseng feela kaha a hlokoa ke batho ho latela boemo. O re bothata boo ba bo hlokomelang ke ba hore maemo a leholimo ha fetoha lipalo tsa bafani ba mali li ea theoha ka lebaka la lifuba le serame se bang teng. A re ba hlokometse khaello ea phano ea leseli sechabeng kaha batho ba bonahala ba sa utloisise hore mali ke tlhoko.

Kalane o re ntho e 'ngoe e thefulang phano ea mali ke bokulo ba mafu a tšoaetsanang joaloka mofets'e le mafu a mang. O bonts'itse ha batho ba entileng kapa ba sebelisa litlhare tsa mofuta ofe kapa ofe ba sa fane ka mali ho fihlela likhoeli tse tšeletseng li fetile.

A re bohlokoa ba ho fana ka mali ke ho tseba maemo a bophelo le ho hlahloba hore motho o phetse hantle 'meleng, etsoe batho ba ea Litsing tsa Bophelo nakong eo ba kulang.

O re mali a fanoa ke motho ea lilemo tse 18 ho isa ho 60, oa boima ba 50 kg ho ea holimo, kaha motho ea boima bo ka tlase a ka hlaseloa ke mafu ha bonolo.

H'a phethela o ipilelitse ho batho ho fana ka mali, hohle moo ba khobokaneng ka lihlopha ba le 10 ho ea holimo le moo batho ba ba bonang teng ba pote ba fane ka mali.

TSE NTLE LITJOTJELA PRESENTS

# WELCOME WINTER Festival

DATE : 04-05 2024

VENUE : QE'ME KA MAFIKENG

10:00AM TILL LATE

COOLER BOX M50

**MC : PARTY ENZYME TSEKOA & EMKAY LS**

**LINEUP : TRUFFLE LS X LOYAL KING X BLUE FLAME**

**DJ THANDOGG (BOKAMO FM) X NTOABATHONG X TEEFIRE**

**WALTER NKOPANE (BOKAMOSO FM) X NCHEME GPMG X BLACK FOX**

**TASHA MAKHETHA (BOKAMOSO FM) X MAKHUBELU X MOSOLA**

**YOUNG WILLY X MALEHLOHONOLO MPHOU X STAAF REH**

TICKET R30

R40 AT THE GATE

DRINK RESPONSIBLY. NOT FOR PERSONS UNDER THE AGE OF 18

www.moeletsoabasotho.co.za

# Se fenekeletsoa likobo



## Nthabeleng Seithleko

**Komiti ea Paramente e lisitseng Litaba tsa Lihloliloeng, e laetse Lekala la Lihloliloeng ho laela Morafo oa Reskol ho emisa hang-hang ka tšebetso. Tsena lihlahetse tulong ea komiti, ea la 23 'Mesa Monongoaha.**

Molula-Setulo oa Komiti Mohlomphehi Moeketsi Motšoaane o bontšitse hore ho bonahala lekala le ba tloisa khati ha le tlameha ho fana ka litokomane tse hlokoang ke bona, ka hona sena se bontša ba sa ikemisetsa ho arabela

litaba tsa sechaba.

O fane ka taelo ea nakoana hore morao o ntseng o sebetsa Kolo Mafeteng, o emise tšebetso ha lekala le ntse le itlhophela ho beha litokomane kapela tse bontšang tšebetso ea morao. O re ba tla boela ba e-ba le kopano le lekala ho tšohla litaba tsena, ho ea pele.

Morena oa Kolo, Rothe Morena Mosiuoa Petlane, o re morafi enoa ea seng a khuletse tšebetsong ba sa tsebe o ne a koale ka selemo sa 2018, hobane ba ne ba batla a arabele litlhoko tsa sechaba joaloka phehlo ea metsi, motlakase le phalliso ea matlo a sechaba. O re o lumela hore

ho bohlokoa hore ba emise tšebetso ha nakoana ho fihlela ho e-ba le tharollo. O tsoelepele hore ho se be le litumelano le lipuisano ho ka batha khalefo ea sechaba.

O re ntho e bohloko ke hore matlo a batho a oele, malapa a mang a tlokotsing le ho hiroa ha ba hiroa.

Mokhatlo oa Basotho ba angoeng ke Matamo le Litšebetso tsa Metsi le Merafo, Lenka Thamae, o re ba tšoare ka thata ho matlafatsa sechaba sa Kolo hore ba be sebete le matla a ho ikemela litabeng tse ba amang. A re esale sebakeng sena ho ntse ho etsoa boithuto bo sa feleng ke lilemo tse 20 empa ba na le pelaelo ea hore bao ba ntse ba rafa taemane.

O re morafi enoa ea fihlang o re ha ikamahanye le tšenyō e entsoeng ke morao o fetileng, le hoja ba fetotse lebitso eseng batho. A re leha ho le joalo ba thabetse hore komiti e tšoare bao matsoho.

Molula-Setulo oa Komiti ea Mabalane Kolo 'Mamahape Hlapane, o supile hore morao o ne o qale ka selemo sa 1993 e le Basotho ba neng ba rafa taemane ka peke le kharafu ba sa qhomisi, empa qetellong ba ba le mechini 'me ba qhomisa. O itse ka selemo sa 2018 ba ile ba koala morao ka le reng o feletsoe ke nako ea boithuto kaha bo etsoa lilemo tse peli, ka hona ba makala ha ba bona tšebetso e etsoa hona joale ho sa thoe letho ho bona.

O re ba hloka morafi a arabele litlhoko tsa sechaba hobane batho ba bang ha ba na moo ba lulang teng ka lebaka matlo a oeleng.

O re ba tseba ho ne ho lokela hore likhoebo li il'o iketa



kapel'a sechaba eseng ena e e saleng e bapala ka bona. A re lekala le ile la itlama ho etsa lintlafatso le phalliso empa hofihlela ha joale ha ho nko ho tosa lemina.

O re hona joale sechaba ha se na khotso, hoo se neng se rerile ho itseka empa ba ba kopile hore ba sebetse litaba ka molao ka hona haeba ba sa fumane thuso ba tla fetela Makhotleng a Molao.

Setho komiting ena, Lephoi Makara o re hoa soabisa hore lekala le iphapanyetse ho arabela litaba tsa sechaba tseo

ba li tsebileng ho tloha khale. O re ka lehlohonolo sechaba se bone ka mahlo hore na bahlanka ba sebetsa litaba tsa bona joang.

Mookameli oa Merafo Lekaleng la Lihloliloeng Mohato Moima, o hlalositse hore litaba sebaka sena ba li tseba le hore morafi o teng ea filoeng lengolo la molao, 'me tebello e ne e le hore a itlhahise sechabeng pele a qala tšebetso. A re hara litaba tse ling o ne a tlameha ho bona hore o fallisa matlo, o etsa lintlafatso le tse ling.



# Ba aha tsela moeeng

## Nthabeleng Seithleko

**Setsi sa Toantšo, Thibelo ea Bobolu le Bomenemene (DCEO) se hlahletse nyeoe Lekhotleng la 'Maseterata, moo se qosang Mongoli oa Teropo e Kholo ea Maseru le ba bang, ka bosholu ba M14Millione, ea khaho ea litsela tse tsamaeang moeeng, ka la 24 'Mesa monongoaha.**

Lengolo la qoso le re Molete Selete, Molefe Nthabane le Matsoso Tikoe ba sebet-

sang ka boemo ba bongoli ba Lekhotla le Lehlo la Toropo ea Maseru (MCC) setsebi se khethileng sa lekhotla le rameralo oa lona ba fane ka

bopaki bo fosahetseng ho MCC, ka hore morero oa litsela tse palamameng o qalile feela ho se joalo.

Banna bana, ba bile ba

qosoa ka bobolu le ho hlatsoa chelete eo e M 14,000,000.00.

Molete Selete ea lilemo li 60, Molefe Nthabane ea lilemo li 62, Matsoso Tikoe ka tse 64 le Kenneth Leong oa tse 53 ho hlaha Naheng ea

Malaysia le khoebo ea SCIG-SMCG JOINT VENTURE ba lokolotsoe ka beile ea M5,000.00 le ho beha paneng thepa ea boleng ba M200,000.00 ka qoso ea bosholu ba chelete M14Millione tsa khaho ea litsela tse palamameng tsa Maseru – MPILO BOULEVARD, lipakeng tsa selemo sa 2021 ho isa ho sa 2023.

Moqosuo oa bone e leng Kenneth Leong o lokolotsoe tlasa lipheho tsa ho beha paneng thepa ea boleng ba M400,000.00 le beile ea M10,000.00.

Baqosuo ba tla boela ba hlaha khotla ka la 15 Motšeanong 2024, kapele 'Maseterata 'Makopano Rantšo.



# Basotho ba theha mokhatlo

## Nthabeleng Seitlheko

**B**asotho ba ikopanya ka marang-rang ba theha mokhatlo oa leruo la likolobe le likhoho, e le karolo ea tlhahiso ea mesebetsi le boipheliso. Tsena li hlalositsoe ke Khethang Manyarela, ka la 24 'mesa monongoaha.

O re ke nako e nepahetseng ea hore Basotho ba ikopanye ba kene temong ka mefuta e fapakaneng. O re ba ile ba hlokomela hore se etsang hore batho ba se kene temong ke tlhokahalo ea chelete le qaleho, ka hona ha ba le 'moho ba tla tseba ho hlola tlala e tjametseng naha.

O bontšitse ha temo e le eona e ka thusang hore batho ba phahame ba iketsetse, kaha e le seo motho a se etsang ka matsoho a hae. O re ba tl'o sebetsa ka thata hobane ba rata hore qetellong bophelo ba bacha ba Lesotho bo matlafale.

O re ba ikopantse e le Basotho ba sa tsebane ka tšebeliso ea



marang-rang, kaha e le kahanyo le tšebetso ea mokhoa o bonolo oa kho-batho bohle, ebile boph-

elo ba ha joale bo itšetlehile ka marang-rang ka hoo ho bonolo hore ba rale bophelo ba bona.

Manyarela o re o bone boikopanyong bona bacha ba bangata ba na le thahasello, 'me seo se tl'o thusa hore, ba tsoe litlolong tsa molao ba iphelise. A re temo e ka fetola bophelo ba naha, sechaba le khoebo kaha ha re ithahisetsa lijo li se na ho ba boima ka litheko.

O re ba tl'o ithahisetsa likolobe tse kholo le tse nyenyane, ba rekise le ho lema lijo tse fapakaneng. A re tlhahiso ha e se e le ntle ba tla hlahisa malinyane a likolobe, 'me ha Basotho ba ka ikopanya ba iketsetsa ho feta 'muso ba tla hlola tlala le bofuma.

O re ha ba le 'moho ba tlameha ho ithehela mesebetsi e le ho sireletsa bokamoso ba bana ba bona. O re temo e tla ba monamoleli ea matla ntlafatsong ea moruo le tlhahiso ea mesebetsi.

E mong oa lihoai tsa likolobe 'Machonela Ntaote, o re leruo la likolobe ha le sokolise joaloka liphoofole tse ling, hobane li hloka ho phela moo ho nang le moea. O re esale a phelisa lelapa la hae ka leruo la likolobe 'me seo a se etsang ke ho rekisa nama ea malinyane mabenkeleng le bahoebi ba Basotho ba rekisetsang sechaba lijo.

A khotlaetsa Basotho ho kena mofuteng ona oa temo hobane ha o na litšenyehelo joaloka mefuta e meng.








# MOB KIDDS EDUTAINMENT

## WINTER WEATHER



### ACROSS

- 3 The process by which snow or ice changes to water.
- 7 A period of very cold winter weather that damages plants.
- 8 Intensely cold temperature.
- 11 The temperature felt by the human body when wind makes it feel colder than the actual temperature.
- 12 Mildly cold feeling.
- 14 Bright with sunshine.
- 16 Snowfall that is so heavy one can see little or nothing on the horizon.
- 17 Ice crystals on a frozen surface; "Old Jack \_\_\_\_\_."
- 18 A large mass of snow that slides down a mountain.

### DOWN

- 1 A standardized measure of how hot or cold it is outside.
- 2 Rain that freezes as it falls.
- 4 A tool used to measure the temperature.
- 5 Water that falls to the earth in the form of rain, hail, mist, sleet, or snow.
- 6 Pieces of ice falling from the sky.
- 9 A solid form of frozen water.
- 10 A storm with heavy snow, strong winds, and severe cold.
- 13 Covered with snow.
- 14 A mixture of snow and water.
- 15 Precipitation in the form of small white ice crystals that form inside clouds.
- 17 Thick water vapor that makes it hard to see.

**WORD BANK:** Avalanche, blizzard, cool, fog, freeze, frigid, frost, hail, ice, melt, precipitation, sleet, slush, snow, snowy, sunny, temperature, thermometer, whiteout, windchill.

## DID YOU KNOW?


### Potential Health Benefits of Crab




Crab is packed with protein, which is important for building and maintaining muscle. Crab also contains high levels of omega-3 fatty acids, vitamin B12, and selenium. These nutrients play vital roles in improving general health while helping prevent a variety of chronic conditions. If you're hungry for seafood, but want a little less sodium, great choices include: Salmon, Flounder, Raw clams.

### SOLUTIONS: MoB92-4532

#### Winter Clothing





# TSA KEREKE

## Baitlami ba keteka Sontaha sa lipitso

### Tšelisothakholi

Likopano tse robong tsa baprista le baitlami ba Kereke e Katholike Lesotho, li ne li phuthehile ho keteka Sontaha se khetheleng sa Molisa ea Molemo, Parisheng ea Maria Mofumahali oa Lefatše, Mazenod, ka la 21 'Mesa mono-goaha. Tšebeliso ena e ile ea simolla ka Sehlabelo se Halalelang sa 'Missa se neng se etelletsoe pele ke Mobabatsehi Tlali Gerard Lerotholi OMI a tlatsisoa ke baprista ba 10.



Khothatsong ea hae o bole-tse hore litaba tsa Molisa ea Molemo li supa tlhokomelo, ketapele le tšireletso joaloka-ha molisa a etsa ho mohlape o matsohong a hae. O bontšitse hape hore litaba tsa Jesu tse supang boetapele, ha li hlaloso ke Mopapa Francis moketeng ona o Moholo oa Molisa ea Molemo o re moetapele ha etellepele ba ka pele, eaba o lebala mohlape o tlang kamorao ho eena. "Ho ba e tla re ho le tjena ha u hetla u fumane hore joale mohlape o ile."

O re Morena Jesu ke eena Molisa ea Molemo, 'me o ile a re etellapele sefapanong. "Sefapanong teng le se ke la re le ka mo sia hobane ke Eena ea re etellang pele ka sa hae sefate, kaha a itse rona re mo sale morao." A rialo a bile a eketsa ka hore kajeno re kete-ka bophelo ba hore o ne a re etelletse pele ka bophelo ba sefapano, 'me kaofela ha rona re ikanne ka sona.

O bontšitse hape hore Jesu e le Molisa ea Molemo h'a ka

ema thoko le mohlape oa hae, empa o ile a theohela kahare ho ona. "Ke ka lebaka lena a neng a lula le barutuo ba hae a ba hlatsoa maoto." A supa hore karolo e 'ngoe ea boetapele ke hore ha motho e le moetapele, h'a etellepele feela empa o lokela ho boela ho sechaba seo a se etell-etseng pele.

H'a bua ka lipitso teng, o itse motho ka mong o na le mpho e khetheleng eo e leng pitso ea hae. A re ke ka lebaka lena bahlomi ba likopano tse fapaneng tsa Kereke ba ileng ba fumana lineo tse khetheleng tsa moea oa likopano, e leng ona o ileng oa hahlamela bao e leng baprista le baitlami ka-jeno, 'me ba ile ba etsa joaloka Molisa ea Molemo ha ba ikoal-la matlong a bona.

Puisanong le e mong oa bahlophisi ba mokete ona Sr. Pauline Selele HC o itse ka Sontaha sena Morena Jesu Kriste ke eena Molisa ea Mol-emo, 'me ke Sontaha seo Kere-ke e ileng ea hlophisa hore

baprista le baitlami e le balisa ba meea, ba ke ba tsosolose bophelo ba boitlami e leng bophelo ba bolisa.

O re hape ke ho tla tseba-hatsa likopano tse sebetsang kahar'a Naha ea Lesotho, 'me mokete ona o ketekoa selemo le selemo empa e re kaha ba sebetsa litikolohong ba ntse ba potoloha le tsona, ke ka lebaka lena ba leng Tikolohong e Kholo ea Maseru selemong sena, 'me se tlang ba ea Tikolohong ea Qacha's Nek. A tiisa hore boitlami ke kano 'me ba tilo bua le bacha hore ba kene likopano tsena e le hore li tsebe ho phela ka-hare ho naha le ho sebeletsa sechaba sa Morena Molimo.

Ho ea ka ba bang ba batsa-maisi ba bacha, ba Parish ea Mofumahali oa Lefatše, Edward Fobo le Francina Leina ba bontšitse hore ke taba-ta-belo ea bona ho bona bacha ba arabela lipitso tsa bona tse fapaneng, tseo Morena a ba bilelitseng ho tsona ho mo se-beletsa. Ba re tebelo ea bona ke hore kamor'a mokete ona, bacha ba be ba e-na le leseli la hore na ba batla ho ea ho-kae le ho fihlela eng bophe-long ba bona.

Ba tiisa hore mokete ona o bohlokoa haholo kaha ba ithutile tse ngata tsa bohlokoa ka likopano tsa baitlami, 'me sena se tlii'o ba bobebe ho bona ho ikhethela pitso eo ba batlang ho ea sebeletsa le ho tlotlisa Morena Molimo ba le ho eona. Ba re bohlokoa ba pitso ke hore motho a itsebe hore na ke mang le hore na o batla ho phela bophelo ba mofuta ofe lefatšeng lena. Ba leboha ka tsela e khetheleng boteng ba baprista le baitlami ba likopano tse fapaneng.



### 2023-2024 SELEMO B

#### Sontaha sa 5 sa Paseka

Liketso 9,26-31

Pesalema 21

1 Joannes 3,18-24

Joannes 15,1-8



### Khothatso

## Behang tholoana le tla ba barutuo ba ka

Molaetsa oo le o fumanang Mangolong a Halalelang kajeno ke hore Molimo Ntate oa tlotlisoa ha le beha tholoana 'me le ba barutuo ba Kriste (Joannes 15:8). Kriste Evangeling o bolela hore haeba le batla ho beha tholoana ho feta le lule ka ho Eena le Eena ka ho lona. Sena se bolela hore bohle ba amohelang bophelo ba moea, 'me ba hola khalalelong Kriste o lula ka ho bona.

Likamano tsa lona le Kriste li bapisoa le lekala la sefate sa morara, kutu e nka matsoai ohle ho tsoa mobung ebe makala ona a fumana lijo le metsi ho hlaha kutung. Kutu ke eona mohloli oa bophelo ba makala, ka hona haeba mohloli ona o ka pongoa makala a ka omella, a shoa 'me a bola.

Ha ipapisa le sefate sa 'nete sa morara se fanang ka bophelo, Kriste o re Ntate ea Maholimong ke eena molemi kapa mong'a tšimo. Se boleloang mona ke hore Molimo Ntate o rometse Mor'a hae a inotši ho tla pholosa lefatše, hape Ntate o file Mora bophelo e le hore Mora a tle a phele ka ho Ntate le Ntate ka ho Mora (Joannes 5:26). Ka grasias, lerato le tlhokomelo ea Molimo Ntate sefate 'moho le makala a sona sea matlafatsoa hore se hole hantle.

Sefate se leka ka litsela tsohle ho fepa makala lijo tsa moea hore a tle a behe litholoana tse monate, 'me lekala le se nang ho beha litholoana Ntate o tla le poma. Ha feela a sebetsa 'moho le sefate a tla tsoelapele ho fumana bophelo.

Evangeling e Halalelang ho sebelisitsoe lentsoe "tholoana" e se "litho-loana" hobane ha li le ngata li bolela mesebetsi e metle ea tumelo. Ka hona ha e le "tholoana" e supa khalalelo ea motho ka ho lula ha Moea o Halalelang ka ho eena. Tholoana ena ke e behoang ke Moea o Halalelang o hlalisang lineho tsohle tsa ona; lerato, thabo, khotso, mamello le tse ling. (Ba-Galata 5:22)

Paulosi le barutuo ba ne ba phehella ho beha tholoana ena, le hoja barutuo ba ile ba tšoha ha ba bona Paulosi hobane a ne a tumme ka ho hlokoatsa Bakriste. Barnabase a nka Paulosi 'me a mo hlalisa kapel'a barutuo eaba o ba hlaloesa kamoo Kriste a ileng a ithahisa ho eena ka teng. Ebile Paulosi o buile ka sebete sohle ka Kriste Damaseka. Barnabase o ne a sa tšoanela hakaalo ho etsa sena empa ka lebaka la tholoana ea Moea o ile a iphumana a lokela ho arolelana le ba bang thabo ea hae.

Paulosi o ruta Lentsoe la Morena Jerusalema le barutuo, a bua ka phatla e phahameng ka lebitso la Morena, 'me nakong eo bophelong ba hae bo bang tsietsing balumeli ba mo isa Caesarea eaba ba mo romela Tarsus. Mehlang eo barutuo ba Kriste ba ne ba beha tholoana ka mokhoa o makatsang, hobane moputso oa bona e ne e le ho amo-hela ka thabo keketseho ea Kereke Judea, Galilea le Samaria.

Joannes o le laela ho rata ka 'nete le ka liketso hobane mantsoe ha bontše lerato la 'nete, ke puo feela. Lerato la 'nete le bonahala ka ho boloka litšepiso tse entsoeng. Le tseba joang hore le feela le bua 'nete? Ka ho mamela lipelo tsa lona tseo hangata batho ba li bitsang manyeloi a ba lebelang. Ha ba bang ba li bitsa nyenyeletso ea Moea o Halalelang.

Ha le etsa bobele lipelo tsa lona li'a le khalema, hobane bophelo bo bocha boo le bo fumaneng ho Kriste bo le khothaletsa ho khanya le ho beha tholoana kapel'a Molimo Ntate. Ke Eena ea ngotseng melao ea hae lipelong tsa lona, e le hore le tsebe ho hlalohanya botle ho bobele. Ka hona bana beso Morena o re bilelitse ho beha litholoana ka tumelo ho Jesu Kriste le lerato baneng babo rona.

## Bahalaleli har'a Beke

- 6 Motšeanong Benedicta
- 7 Motšeanong Flavius
- 8 Motšeanong Indract
- 9 Motšeanong Hermas
- 10 Motšeanong Comgall
- 11 Motšeanong Ansfrid

# Basotho ba tšepile Bantu

**Tšeliso Thakholi**

**M**atsatsi a se a se makae pele re fihla pheletsong ea lipapali tsa selemo sa 2023/2024, tsa Liki e Kholo ea

oa Liki le ho honyella kahar'a tse 'ne tse ka holimo Lokong. Mahlo a barati le batšehetsi ba bolo ea maoto a shebile Bokaota, ho sehlopha sa Bantu seo ho bonahalang se sebetse ka thata ho sireletsa Mohope oa Pre-

tse 26 tseo e li bapetseng, e fane ka tšepo ho batšehetsi le barati ba bolo ea hore e ntse e tlii'o sireletsa Mohope oa Liki, ha e ne e sasara Lijabatho ka thupa e bohloko ea 2-1, kamor'a hore sethibathibane sa eona se hloahloa Feso Lichaba a fumane karete e

gata ba bolo ba bileng lebaleng ba bile ntsoeleng hore Bantu e ntse e tlii'o sireletsa mohope hape selemong sena.

Kamor'a papali Mokoetlisi oa Bantu, James Madidilane o itse o thabile haholo ke boitelo ba libapali tsa hae ka ho tsepamisa maikutlo a bona meoloaneng eo ba neng ba ipehetse eona, karolong ea bobeli ea papali kaha li ile khefutsong Lijabatho e se e matha pele ka 1-0. A tiisa hore ha se ntho e bonolo haholo ho sehlopha sefe kapa sefe hore ha se se se bapala ka libapali tse robong, ebe se lekanya lintlha le ho hapa papali. A re sena se bontša boitelo le boiphihlelo ba libapali tsa hae.

A supa hore Mohope oa Liki o ntse o le ka matsohong a bona, ha feela ba ka hlola lipapali tsa bona tse

setseng, e leng ea Matlama eo ba tlii'o e bapala mafelong ana a beke, ea Lioli, CCX le ea ho qetela khahlanong le LMPS.

Haele mokoetlisi oa Lijabatho, Molebatsi Mothobi o itse ba ne ba lokela hore e be ba hapile papali eo, empa bahlankana ba ile ba ea lekhongoana holimo ka khopolo ea hore ba se ba hapile papali, 'me ba fihla ba bokellana morao ba leka ho sireletsa ntlha eo ba neng ba se ba e hlabile. Ke ha Bantu e tla futuha ka matla e fihle e lekanye lintlha le ho hapa papali. A re ke taba ea boinahano le khopolo feela e ileng ea tla ka likelellong tsa bona ea hae hore ba se ba hlotse papali, kaha Bantu e ne e se e bapalala ka libapali tse robong. A qetella ka hore ba il'o khutlela morao ho lokisa liphoso tse etsahetseng.



**Vodacom Premier League. Leha ho e-s'ohlake hore na ke sefe se tlang ho hapa chelete e kaalo ka M650,000.00, Mohope**

**mier League, le hoja se tlameha ho hapa lipapali tsohle tsa sona tse 'ne tse setseng.**

Bantu leha e le boemong ba boraro lokong ka lipapali

khubelu, papaling e neng e bapalla Lebaleng la Bambatha, Maseru, ka la 21 'Mesa monongoaha.

Ka lebaka la papali ea eona e ntle barati ba ban-



**Tšeliso Thakholi**

## Lesotho le tla le khau

**S**ehlopha sa Naha sa Papali ea Litebele se hapile khau e le 'ngoe, litlholisanong tsa lipapali tsa Machaba tsa Litebele tseo sepheo sa tsona, e neng e le ho tlotla mohale oa Tikoloho ea Afrika ebile e le President ea mehlang ea Naha ea Afrika Boroa, Mofu Nelson Mandela. Litlholisano tse na li ne li tsoaretsoe Durban, Afrika Boroa ka la 15 ho isa la 21 'Mesa 2024.

Lipapaling tse na Naha ea Lesotho e hlahile boemong ba bohloko linaheng tse 21 tsa Tikoloho ea Afrika tse neng li kenetse litlholisano tse na tsa papali ea litebele. Linaha tse leshome tse ka kapele-pele ka tlhahlamano ea tsona ke Democratic Republic of Congo (DRC), e le eona e hapileng likhau tse ngata ho feta linaha



tse ling, ebe Mozambique, Mauritius, Gabon, Lesotho, Botswana, Angola, Namibia, Egypt le Seychelles.

Athe tse ling tsa linaha tse mohatleng koana li kenyetsetsa Afrika Boroa, Ethiopia, Eswatini, Uganda, Zimbabwe, Tanzania, Cape Verde le Cameroon e le eona ea

bo-21. Sehlopha sa Naha ea Lesotho lipapaling tse na se tlahoia se bapetse ka boqhetseke bo bohloko kaha ho latela boemo ba litlholisano tseo, ka moo li neng li le ka teng e bile tse matla haholo ho latela boiphihlelo ba linaha tse ling se neng se qothisana lehlokoa le

e le ho holisa lipapali le nako e khutšoanyane haholo ea ho itokisetse lipapali tsa machaba. Tlaleho e tsoelapele ho supa hore litlholisano tse na li boetse li file mokhethoa oa naha monyetla oa ho itsebahatse machebeng le ho tla lula fatše, ho etsa boitlhalobo bo bottle boemong ba naha kaha thota e sa namme ka pele, ho sana le litlholisano tse ling tse ngata tse tlang tsa boemo ba machaba.

E qetella ka ho lebohela Naha ea DRC, e sebelit-seng hantle haholo litlholisanong tse na. Sehlopha sa naha sa papali ea litebele se neng se ke ne tse litlholisano tse na se ne se bopiloe ka bakoetlisi ba bane e leng Diamond Lengolo, Tieho Ntulo, Velaphy Snyman le Limoho Leqele le libapali tse 12, e leng tse tšeletseng tsa bahlankana le tse tšeletseng tsa baroetsana.

# Rugby e khothatsa Mthimkhulu

**Tšelisothakholi**

**P**apali ea basali ea rugby e hlalosa ke mokoetlisi oa Sehlopha sa Mabitla Gorillas, Monghali Folanane Mthimkhulu e bonahala e hola ka potlako le hoja e-s'o fihlele boemo ba ho pharalla le naha.

Sena Mthimkhulu o se hlalositse kamor'a hore sehlopha sa hae se teteke sa Warriors Ladies ka 10-5, papaling ea bona ea boraro ea Liki e neng e bapalloa Motebong oa Sesole, Maakoanyane ka la 20 'Mesa monongoaha. Athe papaling ea pele NUL Spears Ladies e ile ea halala Academy Ladies ka 27-12.

A re sehlopha sena se nt-seng se bontša kholo papaling ea rugby ka 'mapalo oa sona o motle, se bopiloe ka Likolo tse Phahameng tse supileng tsa Setereke sa Butha-Buthe. A re ke lekhetlo la boraro ba bapala empa ba e-s'o lahleheloe ke papali kaha lipapaling tsa bona tse peli tse qalang ba ile ba hlola NUL Spears Ladies ka 14-0 ba hlabile Try tse tharo. Papaling ea bobeli ba khakhatha Academy Ladies ka 17-0.

Mthimkhulu o re ha se mosebetsi o bonolo ho theha sehlopha sa basali sa papali ea rugby, le hore se be se qetelle se bapala Liking e Kholo, kaha qholotso e kholo eo ba kopanang le eona ke ea hore ho ntse ho se bonolo ho batsoali ho lokolla bana ba banana ho tla bapala papali ena. "Hoba ha ba e shebeletse ba na le mohopolo oa hore ke papali e kotsi, athe ha ho joalo e ntse e tšoana le lipapali tse-na tse ling kaofela."

E le ho hlola qholotso ena, o re ba se ba qalile ho kenya moea oa lerato la papali ea rugby kahar'a banana le bashanyana ka ho ba ruta eona, ho tloha Likolong tsa Mathomo ho ea ho tse Phahameng. "Kaha boholo re sebetsa ka bana ba likolo, ha bana bao re nang le bona ba fetela mafapheng a fapakaneng a bophelo, re se re ntse re e-na le sehlopha se seng se secha. Ha ho na mohla rugby e tlang ho putlama ka Butha-Buthe. Re batla e hole ho feta mona." A rialo. Athatiseletsa ka ho khothaletsa banana le basali ho tla papaling ea rugby ka bongata, empa ba



ele hloko hore e batla batho le lerato la eona. A phethebi ba Butha-Buthe ho etsa papali ea rugby ea basali e hole. ba nang le boitelo, mamello la ka ho ipiletsa ho bahoeletsoho la monna, e le hore

## Kopanang 'moho ho bapala



**Tšelisothakholi**

**B**ahlophisi ba papali ea Table Tennis ba tsoile letšolo literekeng tse fapakaneng ho tšoaetsatsi la Lefatše la papali ea Table Tennis, tlasa mohoo o reng: "Mefuta eohle ea batho e kopane 'moho, ho bapala papali ea Table Tennis, ho kenyelelitsoe le batho bohle ba phelang le bokooa". Tsena li hlaleletse puisanong le mohlophisi oa papali ena Mofumahali Molieli Matsepe ka la 24 'Mesa

monongoaha.

Mofumahali Motsepe o boletse hore ba se ba entse mekete e 13 ea papali ea Table Tennis ho tloha ha ba qala ho tsoa letšolo la ho tlotlisa letsatsi lena. A re ba qalile Seterekeng sa Mohale's Hoek ka la 5 'Mesa, ka la 6 'Mesa Quthing, ka la 13 'Mesa Berea, 'me ba tliilo koala mekete ena Lepereng, Maseru, mafelong ana a beke. A re lefatše ka bophara letsatsi lena le ketekoa ka la 23 'Mesa selemo le selemo, 'me le bona ba le ketekile ka lona letsatsi le tšoanang, empa ka Molieli Matsepe ba tlii'o le koala ka

molao ka lihlopha tse fapakaneng tsa papali ea Table Tennis.

A re morero o moholo oa ho keteka letsatsi lena ke ho etsa tlhokomeliso ho sechaba hore papali ea Table Tennis e teng, 'me e buletsoe hore e ka bapaloa ke mekhahlelo eohle e fapakaneng ea batho. "E ka ba ke bacha, ba baholo, ba seng ba tsofetse le bohle ba phelang le bokooa." A re letsatsi lena le boetse le ba thusa hore ba khothaletse sechaba sohle sa Basotho ho itahlela ka setotsoana kahar'a papali ena.

A tsoelapele ka hore ba

tho bohle ba amohelile papaling ena, ka litsebo tsohle tseo ba nang le tsona ho tla e holisa le ho matlafatsa. A tiisa hore papali ena ke pheko ea mafu a mangata kaha e thusa ho fokotsa khatello ea maikutlo, e bopa bongoe, setsoalle le ho etsa 'mele e lulang e shahlele e phetse hantle ka linako tsohle.

Athe ka ho bacha teng, o itse e ba thusa ho ba tlosa linthong tse kotsi tse ka senyang bophelo ba bona. A ipiletsa ho bacha le ho batho ba baholo ho tla ka bongata, kaha e le bohlokoa haholo bophelong ba bona.

Tšelisotho Thakholi

# VCL le ETL li hlakola linomoro

**M**ookameli oa Litaba tsa Kantle oa Kampani ea Vodacom Lesotho, Monghali Tšepo Ntaopane o re kampani ea habo e tl'oa hlakola linomoro tsohle tsa mehala tse ka sesiung sa bona, tseo beng ba tsona ba e-s'oa ngolise ka la 30 'Mesa monongoaha. Linomoro tse na li kenyeletsa tse kentsoeng kahar'a li-router le li-modem. O buile tsena phatlalatsong eo a e ntšitseng Ntlo-Khola ea Vodacom, Maseru ka la 24 'Mesa 2024.

O itse ho tloha ka la 1 'Motšeanong monongoaha, bosiu ka khitla linomoro tsohle tse sa ngolisoang li tla hlakoloa ka sesiung sa bona. "Sena se bolela hore beng ba linomoro tse joalo ba tl'oa hloleha ho fumana litše-

beletso tsa bohlokoa joaloka ho letsa, ho letsetsoa, ho sebelisa Data, ho fumana melaetisa e tsoang libankeng le ho sebelisa M-Pesa." A rialo.

Ntaopane o bontšitse hore batho bao linomoro tsa bona li ileng tsa koalloa ngoliso ka la 31 Pherokhong monongoaha, li ntse li le teng 'me ba fuoe monyetla oa ho qetela hofihlela mafelo a khoeli ena ea 'Mesa. Ka hona ba koptjoa ho ikopanya le bangolisi ba li-SIM card metseng le metsaneng ea habo bona, ba tšoare karete ea naha e boitsebiso. "Ba ka boela ba etela lebenkele la Vodacom Lesotho le haufi le bona ba tšoare karete ea naha ea boitsebiso." O boletse joalo.

Puisanong le Raliphatlalato oa Vodacom Lesotho, Monghali Lebhang Chefa o tiisitse phatlalato ena, a ba a eketsa ka hore basebelisi



ba M-Pesa, bao e bang ba ne ba e-na le lichelete ha linomoro li koalloa, chelete eohle ea bona ba tla e fumana leha nomoro e se e koetsoe empa ba se ba ka e lokolleloa feela Ntlo-Khola ea Vodacom Lesotho.

Ho sa le joalo Kampani ea Econet Lesotho le eona e entse tlhokomeliso e tšoanang ho basebelisi ba lihlahisoa tsohle tsa eona, hore ka la 30 'Mesa monongoaha linomoro tse sa ngolisoang li tla koalloa ruri le ho fanoa

ho baji ba bang ba litšebeliso. Ea boela ea etsa tlhokomeliso hore ba ke keng ba ngolisa linomoro tsa bona ba tl'oa lahleloa ke lichelete tsohle tsa bona tse lipolokelong tsa Eco Cash ho kenyelelitsoe le litšebeliso tse ling.

## Challenges of marriage

**O**ften times we want to understand why marriages fail because we naturally believe in a union of a family, the failure of marriages depresses those involved, those at close range and the society at large. Marriages fail because we marry wrong, most of us marry our partner's social positions or status not their persona, we turn to make permanent decisions on a temporary state. We ignore all the red flags because we are fascinated by the temporary state of a position the partner holds or a possibility of a fancy life style, ignoring the most important components of a stable family, love and happiness.

Now when we are married, we look for what was never there in the first place, love and happiness, we are no longer enticed by what

pulled us in to the marriages, fancy life style and the partner's social class, these become irrelevant, happiness and love become

a necessity, the question is, were they there before, where do we expect them to come from? It is at this point where we feel marriages

are failing and we want to pull out, are marriages failing or we make incorrect decisions?

There are so many reasons why our marriages fail, we can't really discuss them

in one article, but one of the critical reasons is that we change partners because we are so used to our bad habits to a point that they form part of who we are, if our partners aren't happy with that behaviour we would rather change them not our behaviour.

At times when we are in a relationship with people, we are attracted to them for a particular reason, but once in love we look for things which didn't attract us and see a lot of deficiencies, we magnify their mistakes and ignore their strengths, in this way the only thing we see when we look at them is incompetence.

The other reason is when our partners may have made a mistake we treat them as mistakes not as people who made mistakes, and the only logical solution to a mistake is to get rid of it. Indeed there are many reasons but if we can look at ourselves through the reasons we discussed here we maybe able to salvage our marriages.

**Teboho Matjeka**

